

# Drög að ályktun um utanríkismál

Meginmarkmið íslenskrar utanríkisstefnu er að gæta hagsmuna lands og þjóðar og veita öflugt fyrirsvaer gagnvart öðrum ríkjum. Sem smáríki á Ísland hag sinn undir því að alþjóðalög séu virt og þjóðir leysi sín deilumál friðsamlega. Eins eru það hagsmunir smáríkja að stuðla að alþjóðlegri samvinnu til þess að mæta þeim ógnum sem virða hvorki landamæri né leikreglur alþjóðakerfisins. Fríverslun og aðgangur að mörkuðum er viðskiptaþjóð eins og Íslandi lífsnauðsyn. Því er það forgangsmál að Ísland njóti ávallt bestu kjara í viðskiptum við aðrar þjóðir.

Ísland skal áfram leita eftir samstarfi við þjóðir innan og utan Evrópusambandsins á grundvelli frjálsra og sanngjarnra samninga og samvinnu sem byggir á jöfnuði og ábata allra aðila. Með slíkum samskiptum geta íslensk stjórnvöld tryggt hagsmuni Íslands best á hverjum tíma. Framsóknarflokkurinn telur hag lands og þjóðar best borgið utan Evrópusambandsins. Nú sem fyrr standa auðlindir þjóðarinnar undir velferð hennar og fullt og óskorað forræði á þeim er forsenda farsældar til framtíðar. Framsóknarflokkurinn telur að þjóðin skuli ætíð eiga beina aðkomu með þjóðaratkvæðagreiðslu að ákvörðunum um stórmál eins og aðild að Evrópusambandinu og mun berjast fyrir þeim rétti.

Norrænt samstarf og grannsvæðasamstarf skipi sem fyrr mikilvægan sess í utanríkisstefnu landsins. Ísland á sameiginlegu hagsmuna að gæta með nágrannaþjóðum sínum hvað varðar auðlindir, arfleifð og þjóðmenningu. Framtíðarhagsmunir þjóðarinnar liggja í að nýta og vernda auðlindir á og við Ísland. Það gerum við best í samstarfi við þjóðir og lönd sem hafa sameiginlega hagsmuni og skilning á slíkum málum. Því er gott samstarf Norðurlanda og vestnorrænna þjóða mikilvægt.

Framsóknarflokkurinn leggur jafnframt aukna áherslu á samstarf við nágrannaþjóðir við Norður-Atlantshaf m.a. vegna aukinna flutninga á norðurslóðum og loftslagsbreytinga. Lögð er áhersla á að Ísland nýti möguleikana sem felast í auknum skipaflutningum um Norðurslóð og bregðist við með umskipunarhöfn á Íslandi fyrir slíkar siglingar. Aukin umferð skipa kallar á aukið eftirlit með sjóferðum og samstarfi við aðra hagsmunaaðila svæðisins. Ísland á að hafa frumkvæði að stofnun alþjóðlegs öryggis- og björgunarliðs sjóferða sem hefði höfuðstöðvar hér á landi. Nýta skal möguleikana sem felast í fríverslunarsamningi Kanada og EFTA-þjóðanna auk þess að koma á fleiri fríverslunarsamningum við ríki utan EES-svæðisins. Leggja skal áherslu á að styrkja og auka innlenda fæðuframléiðslu í ljósi fyrirsjáanlegrar þróunar loftslags á næstu áratugum. Mikilvægi auðlinda eins og endurnýjanlegrar orku, landbúnaðar, sjávarútvegs og drykkjarvatns mun aukast mjög á næstu áratugum. Yfirráð og úrvinnslu auðlinda lands og þjóðar þarf því að efla.

Aðild Íslands að Atlantshafsbandalaginu ásamt þátttöku í varnarsamstarfi við aðrar þjóðir á jafnréttisgrundvelli tryggja best öryggi borgaranna og ríkisins enda séu mannréttindi og lýðræði leiðarljós slíks varnarsamstarfs.

Framsóknarflokkurinn telur friðargæslu mikilvægan þátt í utanríkisstefnu Íslands. Leggja skal áherslu á aðkomu borgaralegra sérfræðinga að uppbyggingu á svæðum sem orðið hafa fyrir hörmungum.

Siðferðislegar og pólitískar skyldur leggja okkar á herðar sem ábyrgri þjóð í samfélagi þjóðanna að taka myndarlega þátt í alþjóðlegri þróunarsamvinnu í baráttunni gegn fátækt. Lykillinn að starfi Íslendinga í þróunarmálum á að vera sá að veita fólki í þróunarríkjunum frelsi frá fátækt. Stefna ber að því að Íslendingar auki opinber framlög á næstu árum og verji 0,7% af vergum þjóðartekjum til þróunarmála eigi síðar en árið 2018. Leggja ber höfuðáherslu á árangur og sjálfbæra þróun í alþjóðlegri þróunarsamvinnu. Verkefni Íslendinga taki ávallt mið af þúsaldarmarkmiðum Sameinuðu þjóðanna. Stuðla ber að fræðslu og vitundarvakningu meðal íslensku þjóðarinnar um alþjóðlega þróunarsamvinnu.